

Izjava OHR-a na konferenciji za medije međunarodnih organizacija

OHR, Kevin Sullivan

OSCE, Mersiha Čaušević-Podžić

ICTY, Matias Hellman

EUFOR, Jem Thomas

OHR

Vijeće ministara mora do četvrtka donijeti odluku ukoliko želi ispuniti rokove u vezi sa reformom policije

Vijeće ministara mora prije roka koji su sebi sami postavili, a to je 31. decembar, oformiti Direkciju za implementaciju plana reforme policije, koji je odobrila Evropska komisija. Ovaj rok su odobrili parlamenti u BiH te Evropska komisija. Kako bi potrebno osoblje bilo imenovano na vrijeme do kraja roka, a to je kraj godine, Vijeće ministara mora najkasnije u četvrtak usvojiti Odluku o osnivanju Direkcije, koja će biti prihvatljiva za Evropsku komisiju i Sjedinjene Američke Države, koje nadgledaju ovaj proces. Odluka o osnivanju Direkcije predstavlja tek prvi korak ka njenom osnivanju i kako stvari sada stoje postoji opasnost da vlasti Bosne i Hercegovine neće ispuniti svoj prvi rok u ovom procesu, rok koji su sami postavili i koji je odobrila Evropska komisija. To bi uputilo veoma negativan signal imajući u vidu činjenicu da implementacija reforme policije predstavlja jasan zahtjev Sporazuma o stabilizaciji i pridruživanju.

Više posla znači više povrataka

Visoki predstavnik će večeras govoriti na otvaranju izložbe fotografija koju organizira UNHCR. Visoki predstavnik će naglasiti da najveća prepreka povratku nije političke ili administrativne prirode, već je to nedostatak mogućnosti koje pruža privreda. Visoki predstavnik će naglasiti da «Svaka reforma koja omogućava lakši početak rada nekog novog preduzeća u BiH ili olakšava da se privuku ulaganja ili olakšava otvaranje novih radnih mjesta, povećava mogućnosti preostalih izbjeglica i raseljenih osoba da se vrate svojim domovima.»

Visoki predstavnik izrekao pohvale general majoru Leakeyu i pozdravio general majora Chiarinija

Visoki predstavnik će danas u 14.00 sati u Kampu Butmir, komandi EUFOR-a, prisustvovati ceremoniji zvanične primopredaje dužnosti između general majora Leakeya i general majora Chiarinija. Visoki predstavnik je pohvalio generala Leakeya zbog preduzimanja smionih koraka koji su bili neophodni da bi se EUFOR afirmirao kao vjerodostojna snaga u BiH sposobna da očuva sigurno okruženje. Ne samo da je EUFOR preduzeo zadatke koje je ranije izvršavao SFOR nego je i *proširio* te zadatke dajući sebi ključnu ulogu u borbi protiv organiziranog kriminala i pomažući vlastima BiH u njihovim aktivnostima da riješe stalno prisutni skandal da se osobe optužene za ratne zločine i dalje nalaze na slobodi.

OSCE

Misija OEES-a u Bosni i Hercegovini obilježava Međunarodni dan ljudskih prava

Ujedinjeni su narodi 10. prosinca 1948. usvojili Opću deklaraciju o ljudskim pravima, koja proklamira slobodu i prava svih ljudi. Od tada, svijet slavi nadnevak usvajanja ovoga dokumenta, kao Dan ljudskih prava.

Kako bi obilježila ovaj dan, Misija je OEES-a u BiH pokrenula dosta aktivnosti, koje se održavaju širom zemlje.

Veleposlanik Douglas Davidson, voditelj Misije OEES-a u BiH, danas je u posjetu Mostaru, gdje će sudjelovati u debati o ljudskim pravima s učenicima srednjih škola i studentima Mostara, u organizaciji Nansen Dialogue Centra.

Početkom studenoga ove godine, OESS je pokrenuo natjecanje za najbolji esej na temu ljudskih prava, za srednjoškolce širom BiH. Zaprimljen je značajan broj eseja iz svih dijelova zemlje.

Veleposlanik Davidson, Vildana Selimbegović, glavna urednica magazina *Dani*, Mirsad Kebo, ministar za ljudska prava i izbjeglice BiH, i Srđan Dizdarević, predsjednik Helsinškog komiteta u BiH, sastat će se ovoga tjedna, kako bi donijeli odluku o pobjedničkom eseju.

Ovoga 9. prosinca 2005. godine, u petak, održat će se tiskovna konferencija, na kojoj će se proglasiti pobjednici, a koja će biti i prigoda, da se oda priznanje duhu i principima Opće deklaracije o ljudskim pravima – kao što su : poštovanje, jednakost, tolerancija i različitost.

Pored toga, OESS-a u suradnji sa BHT1, podržao je 15 TV emisija, serijala: *Imam pravo na...* koji će se izričito baviti pitanjima ljudskih prava. Prva će emisija iz serijala biti emitirana ove subote, 10 prosinca, na sam Dan ljudskih prava.

ICTY

Dobro jutro svima ispred Haškog tribunala.

Za danas imam jedno saopštenje. Sutra ujutro, u 8:00 sati, Pretresno vijeće I Međunarodnog suda će izreci svoju presudu u predmetu Miroslava Brala.

Bralo je 19. jula priznao krivicu za zločine počinjene u općini Vitez, između ostalog u selima Ahmići, Nadioci i Kratine, od aprila do jula 1993. Izjasnio se krivim po osam tačaka optužnice koje ga terete za progone, ubistvo, mučenje, silovanje, protivpravno zatočenje civila i nehumano postupanje.

Pripremili smo za vas CD romove na kojima se nalaze sljedeći dokumenti iz ovog predmeta:

- Sporazum o izjašnjavanju o krivici
- Činjenična osnova u prilogu Sporazuma
- Izmijenjena optužnica
- Podnesak optužbe o odmjeravanju kazne (na engleskom)
- Javna verzija podneska odbrane o odmjeravanju kazne (na engleskom)
- Podnesak odbrane sa dodatnim materijalima u vezi sa odmjeravanjem kazne (na engleskom)

Podnesci optužbe i odbrane o odmjeravanju kazne između ostaloga sadrže izjave svjedoka. Podnesak odbrane o odmjeravanju kazne takođe sadrži ručno pisanu izjavu Miroslava Brala pod naslovom "Moje izvinjenje". Podnesak odbrane sa dodatnim materijalima za odmjeravanje kazne sadrže i informacije o nedavnom razvoju događaja u vezi sa pronalaženjem ostataka žrtava zločina koje je počinio Miroslav Bralo.

Tužilaštvo je tražilo da se Miroslavu Brali izrekne zatvorska kazna u trajanju od 25 godina. Bralina odbrana nije predložila nikakvu konkretnu dužinu kazne.

Pozivam vas da na Internet stranici Tribunala pratite direktan prenos izricanja presude. Nakon toga ćemo takođe uslijediti saopštenje za javnost.

To je sve za danas. Hvala na pažnji.

EUFOR

Nije bilo izjava.

Pitanja novinara:

Ognjen Begović, SRNA:

Kevin, šta se dešava u vezi 28 milion KM koje Uprava za indirektno oporezivanje duguje vladi Republike Srpske?

Kevin Sullivan, OHR:

Dakle, kao što već znate to je pitanje koje je pokrenuo Upravni odbor Uprave za Indirektno oporezivanje. Upravni odbor se sastoji od tri člana, tačnije od trojice Ministara za financije. Prikladno je da se ovaj problem riješi na Upravnom odboru, važno je da se tu riješi i da se riješi što je prije moguće kako ne bi postojale nikakve nejasnoće pred uvođenje Poreza na dodatnu vrijednost (PDV) 1. januara. To je naš stav.